

Mounde qui at sàbin tout, que-s en y trobe pertout, à bourroulhs !...Lechat-lous créde de qu'at sabin tout, més boutat-lous debat lous pès quauques questious ou se pouderan ha gaha, coum lous mèrlous à las sedades...

Bam, digat-me quin poudérét esplica aço : en û medich cam que y a 15 baques, 50 àulhes e 25 aucats. Tout que pèchen la mediche yèrbe. Quin se hè alabets que las baques hassen péus, las àulhes lâ, e lous aucats plumes e plumachous ? Digat-m tabé perqué lous lapis, qui poden bibe chens yamey bébe, hèn toustem pipis alabets que las poures, qui, éres, nou poden bibe chens bébe, nou las bedét yamey ha la mendre pichade ?

E, ta feni, respounét ad'aqueste bielhe bourricade. Quine diference bedét enter û hèch de palhe e û hèch de hé ? Nou-n sabét arré ! E doungues lous àsous, per nouste endaban, qu'at an toustem sabut. E toutu, n'at an yaméy legut enloc !

Biban ! lou lè mounde que lou mounde dous qui-s creden sapiens ! Més be soun boûs e beroys lous qui pensen que, mey en sabet, mey que bedet tout ço qui-b demoure à apréne. Urous lous qui an coumprés que « pèrde-s ue errou qu'éy gagna au pèys de la bertat ».